

la Compagnie à Cocin, qu'il auoit senty en son ame, au milieu dece danger, vne certaine force, & vertu que Dieu luy auoit distillée dedans le cœur.

D'auantage non guere loin du Goufre Perliquel l'an 1554. les Turcs prirent vn nauire; là où il y auoit outre les Portugais quelque nombre de nouveaux Chrestiens, iusques à tréte-six ou enuiron, tous enfans de Malauar, de l'age depuis deux ans iusques à dixsept, que les Mores essayèrent de reduire à leur meschante secte, tantost par carellé, & tantost avec menaces, voire iusques à les battre, & leur faire tout plein de tourmens: & entre autres cruautés d'ont ils vserent, ils feirent degouter sur leur tendre, & delicate chair de la gresse fondue au feu; Mais la vertu, & grande constance de ces ieunes enfans mesprisans tous ces tourmens, & beaucoup d'autres outrages, finalement ces bourreaux se desistrent d'vn, par force & malgré qu'il en eust le circoncièrent, puis ils luy obiectoient qu'il estoit Maure, à quoy il respondoit hardimēt qu'il estoit Chrestien cōme auparauant, car il n'auoit eu que le corps forcé, & alteré, & non pas l'ame. Pareille felonnie fut exercée es Iles del Moro, contre vn grand nombre de nouveaux baptiséz, lesquels ne voulāt laschement abandonner l'Eglise de Dieu, pour r'entrer en l'orde famille de Mahomet, furent en partie vendus à l'instāt, leurs biens estāns confisqués, & en partie cruellement occis, & martirisés.

Mais les choses qui passerent les dernieres années en Amboino, meritent bien d'estre mises au rang de la coustume & vertu des anciens martyrs, non seulement pour ce que les grosses bourgades toutes entieres habitées par les nouvellemēt conuertis à la foy, furent saccagées & pillées pour ceste sainte cause, & en certains endroits tous ceux qui y faisoient residence mis au tranchant de l'espee, mais aussi pour l'extreme cruauté dont les barbares vserent à en meurdrir plusieurs. Car à quelques vns ils couperent tous vifs les muscles des bras, & les rates des iambes, & puis deuant eux les rostissans, & deuorans, despecerāt, & deschirerent les autres mēbres de leurs corps, iusques à ce que ces bons & fideles Chrestiens psmés en la lōgeur de ces tourmens rendissent l'esprit, desquels aucuns iusques au dernier soupir, redoubloient souuent ces douces parolles, IESVS MARIA, pour ne dire rien de ceux qui ont esté faits esclaués, & emmenés çà & la en vne dure seruitude & captiuité. Or ilz endurent toutes ces cruautés, principalement pour ce qu'estans alliegez des Mores, craignans que leur Croix (car c'est la coustume des Chrestiens d'en planter vne en chascune bourgade) ne tombast entre leurs sanglantes mains, ilz l'auoient cachée dedans terre, enuelpée d'vn voile noir, en signe de deuil & de tristesse.

Au reste, les Chrestiens nouuelets ne sont pas tous seuls festoyés de ces peines & afflictions, mais leurs docteurs, & Maîtres y ont aussi bonne part, à fin que comme l'on dict, le disciple ne soit priuilegé plus que le Maistre. Entre les autres vn estant en Amboino maniant fort heureusement les affaires de la foy Chrestienne, fut souuent espie par les mores, & vne fois pres que bruslé tout vif en son logis, là où ilz auoient mis le fen, & ne cessèrent oncques de le gueter, iusques à ce (comme l'on dict) qu'il s'enrent empoisonné. C'estoit vn homme pour insuivre, & maintenir les Chrestiens contre l'impetuosité enragée des barbares, si diligent, & courageus, que les ennemis mesmes admiroient sa magnanimité: & s'il estoit avec cela si liberal enuers les pauvres, qu'ayant vn iour fait vne aumosne de sa chemise, quoy qu'il feust en extremité de maladie, ne luy estant plus demeuré aucuns accoustremēs, s'affubloit d'vn lodier pour aller visiter les Chrestiens, ce qu'il faisoit sans intermission.

Vn autre s'aquittant tresbien de sa charge à l'endroit de son troupeau, fut queiques fois mal mené & battu des Mores, & s'estēt embarque pour aller bap-